

QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum, die Jovis
quartâ Januarii, 1703.

M. NICOLAO ANDRY, Doctore Medico,
& Professore Regio, Præsîde.

An cordis motus à dura meninge?

I.

DUPLEX est cordis motus, diastole atque systole; inter quos quies quædam accidit. In diastole cor sanguinem haurit; in systole expellit, simulque spiritum vitalem unâ cum sanguine per aortam in universum corpus transmittit. In quiete his, quæ hausit, potitur. Mirabilis ille cordis motus non à sanguine profiscitur. Cor enim è vivo animali exsectum suas nihilominus edit pulsationes, licet ne unam quidem sanguinis guttulam in eo relinquant; si ranæ, vel viperæ, vel similis animantis cor recens avulsus explores, hoc pulsare non mediocri tempore conspicias; atque si in frustra scindas, scissæ quoque particule, æstivo potissimum tempore, ordine pulsabunt. Neque etiam à calore quodam insito cor moveri putandum est, ut quidam existimant. Sanguis, inquiunt, cum è vena cava in dextrum cordis ventriculum, & è vena pulmonari in sinistrum illabitur, tum eo calore vel igne, qui utrique ventriculo ab Autore naturæ inditus est, tumefactus, cor ipsum attollit, quod quidem mucrone suo pectus ferit, sicque dilatatur, ut apertis arteriarum valvulis, sanguis à corde in arterias solius effervescentiæ seu ebullitionis vi protrudatur; quæ sanè sententia, quam à vero distet, quis non intelligit? Cum inde sequatur, sanguinem è venis in cordis ventriculos tempore systoles admitti, & è corde in arterias propelli tempore diastoles, quod experientiæ adversatur. Præterea ebullitio aut effervescentia sanguinis non satis habet virium, ut cor ipsum movere, totamque sanguinis molem ad partes corporis extremas propulsare, & ab iis ad cor referre possit. Quid plura? In vivorum anatome minimè observatur illa cordis caliditas, quin imò irritato animali tormentis anatomicis, dum secatur, satis moderato calore cor tractantem manum afficit, nec alius gradus quam in cæteris visceribus, cum non prætergrediatur quadragesimum thermometri, qui calor calori temperato solis æstivi affinis esse videtur. Unde igitur petendus sit uterque ille motus tum diastoles tum systoles, si quis querat, non aliud acceptum referre poterit, quam instrumento cuidam spiritus animales in cerebro elaboratos exprimentî, deindeque in cæteras corporis partes vi quadam protrudenti.

ENIMVERO cor musculus cum sit, non aliunde motum suum mutuari potest, quam unde ceteri muscoli, nempe à spiritibus seu partibus tenuissimis & ætuosis, quæ è cerebri anfractibus exprimuntur, ac deinde per totum corpus, nervorum ope diffunduntur. Musculum autem cor esse statuit olim Hippocrates; quod, quanquam ab omnibus ferè Medicorum scholis improbatum diu fuerit, nostris tamen temporibus ita demonstratum videtur, ut jam ab oppositâ sententiâ stare vix liceat. Duplex potissimum in corde fibrarum ordo vel series observatur: quarum altera à basi versus mucronem obliquè, scilicet à dextrâ in lævam, spirali ductu descendit: altera contrario ductu à lævâ in dextram ad basim usque obliquè producitur, ex tendinosis earundem fibrarum extremitatibus conflata; qua ex structura facillè intelligitur, cor esse musculum, cujus contractio & dilatatio ex hujusmodi fibrarum contractione & relaxatione proficiscitur. Neque obstat, quodd color in cæterorum musculorum carne rubicundior sit, ipsaque caro mollior, quam in corde, cæterorumque musculorum actio à voluntatis imperio pendeat, cum contrâ cordis substantia motum habeat, qui neque sisti à voluntate nostra potest, neque concitari, aded ut indefinenter multorum annorum spatio sine ulla defatigatione aut noxa cœatur. Ex his quid argui potest, nisi cor musculum esse inter cæteros præstantissimum?

III.

INSTRUMENTUM autem, quò spiritus animales è cerebro exprimuntur, atque in musculos propelluntur, membrana est dura meninx, appellata, quæ cranio resectò, statim sese conspiciendam exhibet, quæque cordis texturam ita æmulatur, ut certè cor cerebri meritò nuncupari possit; habet enim & ipsa varios fibrarum ordines adverso ductu incedentes ac sibi invicem superstratos, miroque artificio contextos, quibus mirum systoles atque diastoles motum, cordis instat, peragit & adimplet. Ex tribus diversis fibrarum ordinibus componitur dura mater: Horum ordinum alter in hujus meningis parte convexa, reliqui duo in ejusdem concava observantur. In satis amplas cavitates veluti totidem ventriculos dirimitur hæc membrana, cujus portio duplicata versùs postèriora latior, ætior versùs antèriora, falcis messoriæ figuram æmulans, falcis quoque nomine appellatur. Adest, præter falcem messoriam, septum aliud, cerebrum à cerebello sejungens. Septum hoc ex duplicatura pariter meningis sicut & falx constituitur, unde robustum quoque existit, & quâ cerebrum in spinam elongari incipit, tendinis instar crassum apparet. Habet dura mater in utraque sui superficie peculiarem fibrarum aut lacertorum texturam, quapropter tanquam cor quoddam cerebro & cerebello inserviens, analogiâ quadam, haberi potest. Hujus in parte interiori seu concava, quâ cerebrum contegitur, occurrunt lacerti ex innumeris, iisque validissimis fibris manipularim coëuntibus constructi, quorum exortus, tendentia, connexio atque figura non ubique, nec in omnibus similis est. Hi varias illius in partes expanduntur, præcipuè in latera & in partem anteriorem ac posteriorem falcis messoriæ: omnesque fibrarum ordines desinunt in septis quæ falx gignit, præcipuè in illo quod cerebrum à cerebello dividit. Duræ meningis convexa superficies cranio adhæret; basi autem crani, ubi ea tenuior est, validè & densius affigitur; parti verò ejusdem superiori minùs firmiter & frequenter alligatur: quare & in toto cranio aliæ sunt partes, quibus tenacissimè, aliæ, quibus laxius, aliæ quibus nihil prorsus hæret.

IV.

MIRABILIS illa duræ meningis fabrica, quæ tota, uti cordis fibræ, ad constringendum exprimendumque facta esse videtur, eorùm eorè sententiam

refellit, qui duram matrem non in alium finem esse putant, quam ut cerebrum tegat. Et quidem cum ex circuitu lege quodlibet fluidum de loco in alium non nisi ab impellente corpore solido moveatur, atque idem in nervorum succo, seu spiritibus animalibus, contingere necesse sit, cum & ipse liquor sit; non alium certe præstantiorem reperies hujus fluidi motorem præter duram matrem, quæ suo contractivo motu cerebrum premit. Atque uti cor instar machinæ pressoriæ sanguinem exprimit, & ad remotas quasque partes impellit, ita dura meninx alterum quasi cor, solidum validumque, fortissimi instar elateris & compressoriæ cujusdam machinæ, à glandulis corticalibus fluidum illud animale elicit & in partes corporis propellit. Istiusmodi impulsione necessitatem noverunt quamplurimi anatomes peritissimi, sed de impellente corpore pauci solliciti sunt. Quidam intra cranium quærendam partem aliquam existimant, quæ musculi vices suppleret, vel structura musculari similis foret pro spirituum animalium distributione promovenda. Cæterum cum ipsis de hac parte non satis constaret, in eam facile delapsi sunt sententiam, ut putarent spiritus animales, velut aquam ex alembico, è cerebro in nervos exstillare, quod à ratione absolum esse, quisque vel mediocriter in arte versatus inficias ire non potest. Etenim cum sit spirituum materia admodum tenuis, non ita facile deorsum proprio pondere ferri quiret, sed intra mollem cerebri compagem diutius detineri & quodammodo circumire coacta, tumultuosæ concitationis potius quam ordinati motus parens esset. Necesse igitur est, ut ab aliquo impellente corpore hujus spiritus animalis secretio & motus promoveantur; quod è facilius à dura meninge præstatur, quodd hæc à firmo & stabili termino pendet, eique adhæret, non secus ac musculi ossibus, cor, ope sui ligamenti, mediastino. Annexa itaque dura mater basi solidæ cranii, elateris ad instar, nunc sese contrahens, nunc verò relaxata, ordinatos systoles atque diastoles motus edit, quibus cerebrum nunc premit, nunc liberum linquit. Hi motus eodem tempore fiunt, quò motus cordis, sicuti in capite vulneratis videre est, in quibus dura mater detecta cernitur; eorum enim cordi admotâ manu observare licet eodem tempore, quò pulsât cor, pulsare & duram matrem. Hinc singularis illa cordis cum dura matre consensus; quâ fit, ut læsâ dura matre, cor afficiatur, non verò vicissim. Si dura meninx, vel partes quæ ab illa oriuntur, vehementi morbo laborent, necesse est, ut cor, tanquam ejus elateris & potestati subiectum, ejusdem morbi indicia in pulsu præbeat. Unde meningis in cor imperium ostenditur: cum è contra alteratò motu cordis non semper in consensum trahatur caput.

V.

PULSAT itaque dura mater alternis systoles atque diastoles ictibus, quibus modò crispatur ipsa & cerebrum ita premit, ut ex eo spiritus animales eliciat, eosdem ad cor propellat, & tandem hujus musculi motum promoveat: modò extrorsum restituta ad os accedit, idem cerebrum mox iterum compressura, indeque spiritus animales deinceps expressura. Nec illud sanè mirabitur, si quis propriam duræ meningis vim & efficaciam perpendat; tanta enim hæc est, ut dura meninx proprio robore fulta, his non indigeat administris, quibus cor indiget. Cor enim, cum movetur, auxiliis adjuvatur quamplurimis, qualia sunt aeris pressio continua in pulmonibus, qui agitatione sua sanguinis cursum promovere, valvulæ venarum, perpetua musculorum contractio in motibus quotidianis, aliaque quamplurima ab Harvey, Borello, Cole, Bellino, aliisque recensita; quæ omnia duræ matri defunt, licet hæc membrana non corpus fluidum, qualis est sanguis, sed solidum, quale est cerebrum, comprimendum atque constringendum

habeat. Hic sanè duræ meningis motus arteriis referendus minimè videtur; cum universa duræ matris moles undique pulset æquali impetu, non in iis duntaxat arteriis, quæ per eam disseminantur. Præterea duræ meningis arteriolæ hujus motui excitando ineptæ omninò censendæ sunt, cum paucæ admodum sint, & sextam peripheriæ partem vix occupent: neque iisdem arteriis, etiamsi copiosiores forent, tantus impetus inest, quantus ad motum duræ meningis requiritur. Verisimilius sanè videtur, mirabilem illam duræ matris pulsationem à peculiari ejus constructione & fibrarum elatere omnino proficisci. Atque nuperrimi scriptoris & ejusdem eruditissimi opinio nobis maximè arridet, qui eandem ferè esse ait hujus membranæ rationem atque horologii, quod sine ullo liquidi impulsu, sed tantum ob singularem rotarum, fusorum, elateris, aliarumque partium solidarum constructionem ordinatos motus absolvit. Itaque in humano fœtu, excitatò semel à partibus actuosis, quas semen continet, elasticò motu in dura meninge, impressum sibi motum servat hæc membrana, & suis deinceps systoles ictibus cerebrum comprimit, elicitos hac compressione spiritus animales pellit in cor, quorum appulsu perseverans hujus muscoli motus, toto vitæ spatio, adimpletur.

Ergò cordis motus à dura meninge.

Domini Doctores disputaturi.

M. Armandus Josephus Collot. *M. Joannes Gelly.*

M. Philippus Caron, Pharmacia Chimica Galenica Professor. *M. Michaël Sauvate.*

M. Ambrosius Nicolaus Chémineau. *M. Claudius Burlet.*

M. Ludovicus Poirier.

M. Petrus Bonnet Bourdelot, Serenissima Ducissa Burgundia, Medicus primarius, nec non Regis perpetuò ordinarius.

M. Joannes-Baptista Renatus Moreau, Professor Regius.

Proponebat Parisiis JACOBUS BENIGNUS WINSLOW,
Danus Othinienfis, Baccalaureus Medicus. A. R. S. H. 1703.

Apud Viduam Francisci Muguet, Regis & Facultatis Medicinæ Typographi.